

# KALATE PAUL A NGA TILI

## BOTE YA KOLOSÉ

### Mebatan

(1 Kor 1 : 1, 2; Ef 1 : 1,2)

**1** 1 Ma Paul, nlômane Krist Yésus amu nkômbane Zambe, a Timôteus, mojañe wongan, 2 Bi atili bobejañi be ne mimfufub a ba ya buni e be Krist, be too e Kolosé : mvam é bo'ô e be mia a mvo'é bi so'ô e be Zambe Esaa wongan.

### Paul A Ve Zambe Akéva Ajô Bôte ya Kolosé

( Fil 1 : 3-6 ; 1 Tés 1 : 2-4)

3 Bi ave Zambe akéva, Esaa Nti wongan Yésus Krist, éyoñi bi aye'elaan ajô denan kom ése, 4 éyoñi bi nga wô'ôtane mbunane wônan ya be krist Yésus, nalé fe nye'an mi bili mfa'a mimfufub mise, 5 amu ndinlem é ne mia naan e yôb été, nje mi nga tate wôk a ajô benya mejôô ya mbamba foé, 6 a nga kui e be mia, aval ane a nga kui fe e si nyô ése, a wum bibuma a nenenen, aval ete fe a bo e be mia, ataté môs mi nga wôk a yem a jô mvame Zambe e benyaa mejôô été, 7 avala ane mi nga ye'é je e be Epafras, ebe mboésaaé wongan bi anye'e. Nye ate a ne mvolôbisaé Krist ya buni mfa'a wongan, 8 nnye fe a nga kate bia nye'ane wônan e Nsisim été.

### Môt a ésaé Krist

(Fil 1 : 9-11)

9 Amu ajô ete , ataté môs bi nga wô'ô de, bi nji jô'é ye'elan ajô denan nkômbane wé, a fe'e ése ya nsisim, a ñyemane mam, 10 nde mi aye wulu dulu d'ayian e be Nti, a nyemelan ôse ya nyemele nye nlem, mi wumane bibuma e mbamba mboan ase été a nenenan mfa'a ya ñyeman ya yeme Zambe. 11 mi veba'ane fe ngul ya mimfa'a mise, avale ane éwôlô étôto'o jé é né, ane mi aye bo mban njiban ôse, a ñwuane nlem, a fulane mevak. 12 Mi va'an Essa akéva, nyô a nga bo mia na, mi yian mfa'a ya nyoñ ngab mimfufub, éfufub été. 13 Nnye a nga vaa bia e ngulenjôan ya dibi, a kee bia e éjôé édiñe Mone jé été ; 14 amu nye, bi mbili nkôtan, njamane mam bé. 15 Nye ate a ne éyeka'a Zambe a ne te yené, ntôl ya ntéane jôm ôse ; 16 amu biôm bise bi nga téban amu nye, bi ya yôb, a bi ya si nyô, bi bi ayené a bi bi ne te yené, to bito bejôô, nge ba be bili ngulenjôan, biôm bise binga téban amu nye, a mfa'a wé . 17 Nye ane ôsusua ya biôm bise, a biôm bise bi tii fufulu e be nye. 18 Nnye fe a ne nlô ya ya nyôl, ne é ne kirké; émien a ne atata'a, ntôl ya ba b'aso e miñwuan, nde ete émien a ye bo nyô a ne ôsu mimfa'a mise. 19 Amu e be nye, a nga yen mvaé na, njalan Zambe ôse ô tabe, 20 a na, amu nye a beta late biôm bise e be émien, ja'ana bi ya si nge bi ya yob, a bo bise mvo'é a metyi ya krôa jé.

21 Amu mia, ba mi nga too bejin a besiñ melu mvus e nsimesane wônan été amu mbia mimboan, 22 ve éyoñe ji, a toéya mia mvo'é e be émien e nyôle ya minsône mié amu awu dé, nde ete a ne télé mia asu dé mi too mimfufub,

nya mvo'é a teke'e bijô, 23 nge mi alangan mi too e mbunan été, mi tele a yeme ngul été, mi bo' o te kôlô e ndinlem ya mbamba foé mi nga wôk, nyô a nga kateban e be étetéa jôm ése é ne yôbe si mbamba foé ate nye mamien me nto mboésaé ya été.

### **Esaémvolane Paul E Kirké y Kolosé**

( 1 kor 2 : 7-13 ; Ef 3 : 1-13)

24 Eyoñe ji m'avak e mintae miam été amu ajô denan, a m'asondô e minsône miam été mam me nga buk mfa'a ya minju'u mi Krist ajô nyôle jé, nje é ne kirké, 25 nje éte me nga boban mvolôbisaé ya été aval ane éto ésaé Zambe a nga télé ma mfa'a wônane na, me tu'a jalé mejô me Zambe, 26 mme me ne ndimba jam é nga solô e miaé mise a akala ese, ve éyoñe ji, é litibaneya e be mimfufube mié. 27 Ebe be, Zambe a nga kômbô liti biku jé é ne akume ya étôto'o ya ndimba nyô, nje é ne mia e be Krist, ndinlem ya étôtok. 28 Nnye ate bi akañete, bi lebe mô t ase, a ye'ele mô t asa a fe'e ése, ane bi ne te télé mô t ase ngumba e be krist. 29 Esaé été nje m'ju'u je, me vuñu fe a ngul ése, nje a ve ma e nlem été.

**2** 1 Amu m'akômbô mi yem aka'a beta nsuñan m'asuñ ajô denan, a ajô ba be too Laôdikia, a ajô ba be nji tame yen asu dam, 2 ane minleme miab mi aye vebane ngul ane b'aye tabe nlatane ne ta e nye'an été, ane b'aye bi akum ése ya nya fe'e a ñyemane ya ndimba Zambe, nje é ne Krist, 3 e be nye, menda me akum mese ya fek a ñyemane mam me solô. 4 M'ajô jam ete , nde mô t a bo' o te du'u mia a éwono'o nkobô. 5 Amu akôsabo me ne bo momo e be mia mfa'a ya minsôn, ve me too e be mia a nsisim, me va'ak a fombô ngômô t ntabe jenan e ñyemane ngul ya mbunane wônane e be Krist.

### **Njalan ényîñ e be Krist**

( Yôh 14 : 9,10 ; Rôm 6 : 3-11; 1 Kor 1: 24, 30 ; Ef 2 : 1-18; 1 Tim 6 : 20, 21)

6 Ajô ete, aval ane mi nganyoñe Krist Yésus Nti, nalé ate wula'ane e be nye, 7 mi bemane mindi a nlôñeban e be nye, mi tele ngu e mbunan été, aval ane mi nga ye'é; mi bulu'u ve akéva. 8 taba'ane ntyel, mô t a za bo mia mbilize a bifia bi ñyemane mam a bivôvôla medu'an , aval ane ñye'elane bôt ô né, ane metiñe bifia bi mam ya si nyô, a sa avale ane krist. 9 Amu na, njalan ntabane Zambe ôse ôtoo e be nye a nyôl, 10 a mia fe mi nto njalan ényîñ e be nye, nyô a ne nlô ya éjôé ése a ngulnjôan ése. 11 E be nye fe mi nga tyi'ibane metyel e ntyi'ane atyel ô nji boban a mo, mvasan nyôle minsôn é nga vase mia, e ntyi'an atyele Krist. 12 Mi nga jambe a nye e mbaptisô été, a ñwô ôte mi nga wômo a nye amu mbunan mi nga buni mboane Zambe, nnye a nga wômolô akôlô miñwuan. 13 Mia mi nga to miñwuan e minkômbane mienan été a ébise ya minsône mienan été, Zambe a nga bo mia bevevee a nye, a njaman a nga jamé bia minkobane miangan mise, 14 mfiman a nga mane fimi kalte mvôla, nyô a nga wosane bia a mintyi'ane mé ya metiñ, nnye a nga vaa vôm a mbe, a bômôlô nye krôa. 15 A nga mane vaa mengômesan bejôé benan a ba be bili ngulenjôan, a samele be e be bôt été, a fôn ndañan a nga dañe be a je.

16 Ajô ete, mô t a bo' o te ve mia bijô mfa'a ya ajô ndian, nge nyuan, nge jam d'anambe môs ébek, nge meté me ngon nge sabbat, 17 mam mete me ne ve nsisiñ ya mam m'azu, ve nya nyôlô a ne jôme Krist. 18 Mô t éziñ a bo' o te fiale mia vôm a tindi nsubane si wé, a nkañan a kañ beéngel, a va'a ngul ya mbi'ilan a bi'li mam a nga yen e miñyenan

été, a wulu'u fe nzeza'abe amu nsisimesane wé ya minsôn, 19 ve a ne te timbi a Nlô ñwô w'ayeke ngume nyôl, vôm w'alatebane ne ta a bio a minsis, a ñyalan w'aso e be Zambe.

### **Mfefé ényîñ e be Krist**

20 Nge mi nga wu a Krist, mfa'a ya metiñ bifia bi mam ya si nyô, amu jé mi anyiñ aval ane mi ngenan mi wô'ô a si nyô? Amu jé mi aye'é memvinda ma, 21 Te bi, Te tyek, a Te nambe ? 22 biôm bite bise bi ne ve bi bi ajañ éyoñ b'abelane bie, aval ane mevinda miñye'elane mi bot mi né. 23 Mam me bili fo'ô éve'eela'a ya tindi mam ya nkañan, a nsubane nyôl e si, a ntibilane nyô ve, ve me nji vilo je mfa'a ya minkômbane ya minsôn.

**3** 1 Nde, nge mi nga wômô fufulu mia be Krist, jeñane mam me ne ma ya yôp vôm Krist a né, a to si mbonnôme Zambe. 2 Simesa'ane mam me ne ma ya yôb, sa mam me ne e si nyô. 3 Amu mi nga wu, a ényîñe jenan é nsolô e be Krist e be Zambe. 4 Eyoñ Krist a ye litiban, nnye a ne ényîñe jangan, éyoñ éte mia fe mi aye litiban mia be nye , étôto'ô été.

5 Ajô ete, wôéane bibu'a bienen bi ne bi ya si nyô : mejian, mvin, ayôñe nkômban, mbia nkômban, a minyamete, mmie mi ne nkañane biyeñyeña bi biôm ; 6 amu mam mete ayaa Zambe [ d'azu de e be bon be ne melo]. 7 Mam me te mme mia fe mi nga wulu été melu mvus, éyoñ mi nga nyiñ e mam mete été. 8 Ve éyoñe ji mia fe, finda'ane mam mana mese : ayaa, ayok ; mbia nlem, nkobô ébiasé,nyene nkobô j'akui e menyu menan. 9 Môt te laa nyô mbo'ô minsos, amu mi sô'ôya nnôma môl ate e nyôl, a fulan a mimboane mié, 10 a mi jaéya mfefé mot, ñwô w'aveñesane bo mfefé mfa'a ya ñyeman, aval ane eyeka'a ya nyô a nga té wô. 11 Vôm ate mone Begrek a mone beyude a ji fe bo, nge ntyi'an atyel a ébis, nge mone bilobelobé a mone Sikutus, nge ôlo nge nti; ve Krist a nto mese; a too fe e be bese.

12 Ajô ete, aval ane mintobane mi Zambe, mmie mi ne mimfufub a bôt a nye'e, jaéane nlem ya ñwô'an éngôngo, mvam, nsuane nleme e si, , nje'ebane nlem, ñwuane nlem. 13 Miabebien mi jiba'an, nge môl éziñ a bili nyô mbo'ô ajô, wua a jamé'é nyô mbok, aval ane Nti a nga jamé mia, aval ete fe mi bo'ok. 14 Ve mfa'a ya mam mete mese yôb, jaéane nye'an, ñwô ô ne ngata'a j'alate mese ébañe jia ne ta. 15 Nde mvo'é Krist é jôé minlem mienan été, nje mi nga lobane je e nyôle jia été ? Bo'ane fe ékekaé. 16 Mejô me Krist me tabe'e njalan e be mia, wua a ye'ele a leb e nyô mbok a fe'e ése, ane mi ayia besam, a bia bi ékaña'a, a bi ya Nsisim, a fulan a ékekaé e minleme mienan e be Zambe. 17 Nde mam mese mi abo, mfa'a ya nkobô nge mbôan, bo'ane mese a jôé Nti Yésus, mi va'a Zambe Essa akéva a mu nye.

### **Bisaé bi mvolan amu mfefé ényîñ**

(Ef 5 : 22-33 ; 6 : 1-9 ; 1 Tim 6 : 1,2 ; Tit 2 : 9, 10 ; 1 Pé 2 : 18 ; 3 : 1-7)

18 A beya, su'ane miabebien e si be beyôm benan, ane d'ayian e be Nti. 19 A beyôm, nyeka'an beyale benan, a te boane ayôle minlem e be be.

20 A bon bo'ane bebiaé benan mewôk mfa'a ya mam mese, amu jam ete e ne nkañesan e be Nti. 21 A beésa, te soñane bone benan na, be yaa, be za bo ate'e nlem.

Rev. Matthias MEYE  
Secrétaire Général 1961.....

22 A belo, mfa'a ya mam mese, bo'ane beti benan ya minsôn mewôk, sa a ndômesi ane ba b'ajeñe na bôt be yene be mvaé, ve nleme ne saññ, mi koo Nti woñ. 23 Mam mese mi abo, bo'ane me a nlem, aval ane ngi mi a bo Nti, sa bôt, 24 yemekane na, mi aye nyoñe meya'an ya été ane ngab e be Nti, mi asaéane Nti Krist. 25 Amu ékotekote mô't j'aye fe beta nyoñ jam a nga bo; éfiale mesu é nji bo été.

**4** 1 A beti , bo'ane belo benan mam me ne zôsô a ma m'ayian, yemekane na, mia fe mi bili Nti e yôb été.

### **Paul a lebe be ajô meye'elan**

(Ef 4: 29; 5: 14-17; 6 : 18-20)

2 Bo'ane mban e meye'elan, mombo'ane fe nalé a mvean akéva. 3 Mi ye'ela'an fe éyoñ éte ébien ajô dangan, nde Zambe a ne dii bia mbé ya kate mejô mé , ane bi ne kobô dimba jame Krist; amu jam ete fe me too de nka'an ngata'a, 4 nde me ne liti je aval ane m'ayiane kobô. 5 Wula'an a fek mfa'a ya ba be ne atan; mi tuka'a belane biyoñ. 6 Nkobô wônan ô bo'o a mvam kom ése, ntyitan a nku, nde ete mi ne yem ane mi ayiane yalan mô't asese'e.

### **Mebatan m'asu'ulan**

(Ef 6: 21, 22; Kol 1: 7, 8; File 2, 10-25)

7 Tikikus, mojañ m'anye'e, a mvolô ya buni, a ébemvolô e be Nti, nnye a ye kañete mia mam mese me nga tôbane me. 8 Me lômeya nye e be mia amu jam ete ébien, nde mi ne yem ane bi too, a na, a volô mia minlem, 9 baa Onisémus, mojañ ya buni a nyô m'anye'e; nye a ne fe mô't ya be mia. Bôte bete b'aye kañete mia mam mese m'abobane nne.

10 Aristarkus, ébembô'ô wom a sili'i mia, baa Markus, monekala Barnabas; [ ajô dé nde mi nyoñeya mimbañete na, nge a kui e be mia, nyoñane nye], 11 Yésus, nnye a lobane na Yustus, a sili fe mia. Balé bete b'aso e be ntyi'ane atyele; mmbe bete étam be ne beébé bebobisaé bam mfa'a ya éjôé Zambe. Be ne aka'a bôt e nga volô ma nlem. 12 Epafras, mô't ya be mia mboésaé Krist Yésus, a sili'i mia; a suñ ajô denan e meye'elan été kom ése na, mi tebe ane benya bôtô, mi tuka'a yem nkômbane Zambe mfa'a ya mam mese. 13 Amu me ne nye ngaa na, a bo abui nju'u ésaé ajô denan, a ajô ba be too Laôdikia, a ajô ba be too e Hiérapôlis. 14 Lukas, nsaé bôt m'anye'e, baa Démas, be sili'i mia. 15 Mi sili'i bobajañ be to e Laôdikia, nalé fe Nimfas, a kirke é ne nda jé. 16 Nde, éyoñ kalate nyô a maneya lañeban e vôm mi too, bo'ane na, a lañebane fe e kirke bôt ya Laôdikia été; a nyô a so Laôdikia, mia fe lañane nye. 17 J'ôane fe Arkipus na, a fombô'ô na a jalé ésaémvolan a nga nyoñ e be Nti.

18 Ma Paul, m'atili mia mebatan a wo wom mamien. Mi simesa'ane ngata'a jam. Mvaé é tae'e be mia.

Rev. Matthias MEYE  
Secrétaire Général 1961.....